


Scrìti Vèneti

FILOXOFÌA IN LENGOA VENETA



Raffaele Serafini

Edisiòn: LENGOA VENETA

Raffaele Serafini

Scriti Vèneti

FILOXOFÌA IN LENGOA VENETA



Edisiòn: LENGOA VENETA

A no ghe xè copyrights e tute le parte de sta publicasiòn le pol èsar copià o invià co tuti i mexi, eletroneghi o mecaneghi, anca fotocopie, registrasiòn, e anca la pol èsar immaginà senza permeso scritto de l'autor o dea caxa editora.

All rights are not reserved. All parts of this publication may be reproduced or transmitted in any form or by any means, electronic or mechanical, including photocopy, recording, or any information storage and retrieval system, withouth prior permission in writing from the publisher.

stanpà inte la Venetia

1° Edisiòn jenàro 2016

***A ghe dèdego sto libro a chi ca ga capio ca el el
Veneto el xè Lengoa e ca ghemo da ver el
corajo de parlarlo e scrivarlo ogni dì.***

NOTE DE SCRITURA

Le regole grafeghe, le xè fasiłi e imedià, el ségno “C” a se lèxe [K] frente a o/a/u par exenpio : “**acua**“, “**anca**”. Frente a e/i par exenpio se lèxe invése fà : “**ciào**“, “**céxa**”. La “CH” tipega se lèxe fa in taliàn, par exenpio : “**schei**“, “**Chéco**”. Serte olte la “CH” la se scrìve ànca co “K” : “**skèi**“, “**Kéko**”

A “S” a vién doparà fà na sorda, par exenpio : “Go masa mistieri pa a testa”.

A “X” a xè doparà fà na sonora, par exenpio : “**caxa**” o “**xé**”.

A “Z” a ga isteso vaeor fonetego de a “X”, par exenpio : “**caza**“, “A xè fasie tàxer”, el se podarà scrivàr anca : “A **zè** fasie tàzer”.

La “J” la sostituisse la scritùra gi/ge, par exenpio : “**projèto**“, “**Jijéto**”; la “J” la se pol lèxar fa la “J” de “**John**” in inglese o ànca fa in “**yes**” inglese.

A “Ł” tajà a raprexenta do varianti foneteghe, parchè ghe xè parti de el Veneto ca dixe : “**A** gaina magna **e** erbe” e altri invese dixè “**La** gaina la magna **le** erbe”. Cusita, pa respetar e do varianti serte volte xè scrivesto : “**Ła** gaina la magna **le** erbe”. Mi, bona parte de le òlte dopàro la “L” normàl, asàndoghe el letòr l’opsion de lèxarla o mànco. E dòpie in Veneto no le ghe xè.

No go vołesto èsar pedante fà on acadèmego, vanti tuto parchè go senpre vardà co sospeto chi ca el ghe insegna st'altri parlar puito, e pò parchè na lengoa là ga da èsar descrivesta fa là vien parlà e inte el modo pi fasie par tuti. Penso ca in stì oltimi sento ani, chi ca el ga festo pì mal a là nostra lengoa, a xè stà a nostra prexunsiòn masa granda. El me parèr el xè de scrìvar, parlar e pensar in Veneto, no vargognarse, e mołargheła de scrìvar sol ca poexie e memorie de sti ani. In Veneto podimo parlar de matemadega, de fiłoxofia, de storia, atuaità e de politega...El letòr el podarà vèdar ca el testo el xè stà trà xò doparando dea nostra Lengoa varietà nove, vecie, e de parte difarenti de el Veneto, parchè a richesa de na lengoa a xè propio inte a so diversità; in sto modo a grafia a xè sta doparà co libartà pròpio pa rèndar sta diversità. In sti oltimi àni, partìr da on sciàpo de xente, gà scuminsià la rivinsita e la riapropriasiòn de la nostra Lengoa, storia e coltura. A semo drìo riapropiarse de la nostra identità e dignità de Pòpolo, ca a xè pi inportante ca fàr schèi.. I schèi va e vién, ma l'identità na olta perdesta a xé finìa.

INTRODUSION

A se trata d eon libreto curto festo de artigoli a caràtar filoxofego so temi economeghi, evolusionisteghi, politeghi. Se trata de riflesiòn rasionàl de vària natùra, tute in Lengoa Veneta. Sto libro el xè naltra dimostrasiòn ca co la nostra Lengoa Veneta a podemo esprìmar idee complicà da tipo vário senza lùmiti o bexogni esterni.

saluti

Scriti Vèneti

FILOXOFIA IN LENGOA VENETA

"AL MASRI" : MORTE DE ON IDEALISTA

In tùta la Bòsnia a podì vixitàr i simitèri o i monumènti a ndo se scrìve dèi mòrti, e a se nòta fra le liste infinìe de mòrti, na sèrie de "Al Masri", ca traduxèsto a vol dîr "l'Ejisiàn". Chi ca xèli sti mòrti durànte la goèra de Bòsnia? A se tràta de voluntàri ca li xè partii conbàtar pa la "càuxa" Islàmega, chèli ca li vien ciamà "mujaedìn". A se tràta de toxàti, in sto càxo Ejisiàni, ca li ga molà tùto pa partìr voluntàri e morìr sènsa nòme in mòdo anònemo. De lòri, no a se pòl tignìr gnisòn documènto e scanselàr ògni tràsa de la so orìjen par no métar in parìcolo la fameja de orìjen. El mujaedìn, el xè on òmo ca el rinùnsa a tùto e asèta l'oblìo pa morìr voluntàrio sòto on nòme fàlso, òn vèro antieròe, on idealista. Sto consètto de eroixmo

anònemo el xè prategamènte sconosìo inte la nòstra coltùra osidentàl a ndo i crèa eròi e monumènti drìo ògni cantòn. La sossietà osidentàl, in partigolàr chela Europèo-Statunitènse, la ga de bexògno de eròi. L'anonemà el xè on tabù, tùti sèrca la glòria, serca la vixibilità, la popolarità, tùti li vol diventàr vip o amìghi de vip. Inte la coltùra semìtega a xè difarènte : gnìnte medàje, gnìnte onòri, el silènsio e l'oblìo.

I STATI MODERNI E “EL BEN COMUN”

A semo rivà prodùr, dòpo mileni de stòria, dei vèri mostri politeghi On tenpo a ghe xera rè e inperaduri ca li dimandava pòco e li dàva gnìnte. Pò dòpo co l'iluminixmo e le idèe filantropèghe de fradelansa a semo rivà creàr i stàti moderni co le so republichete e ciamarli : “democrasìe”. El fondamìnto de sti stàti el xera : “el propoxìto de fàr el ben comùn”. Podemo definirlo el vesìlo dei stàti moderni. Dixèmolo el 1800 el gà partorìo dei aborti veri e propri ca altro no li ga festo fòra ca jenaràr goere, sfrutamento, rivolte, etno e jenosìdi, dixastri finansiari, straje. Cheli ca a ciamemo stàti moderni li se ga vestìi de valuri pa otegnèr consenso e li xe diventà lori stìsi la mexùra de sti valuri. Libartà, democrasìa, libaro arbitrio, le xè diventà parole vòde senza senso doparà da strutùre libertisìde. I stati moderni li ga monopolixà tuto: storia, economìa, siense, relijòn, e li ga doparà i sòraditi pa justefegàr l'asentramento de ogni podèr. La dotrìna del “ben comùn” la xè diventà la lèva pa

consentràr podèri e richese incredìbili da parte de marèi de : politeghi, omeni de cexa, notàri, prefeti, militàri, omani de leje,I stati moderni da pretexi servidòr, a li ga s-ciaizà ncòra de pì le màse a tùti i livèli : ideolojego, politego, economego, militàr. Fa cojoni, nàltri a ripetémo de èsar : italiàn, inglexe, spagnòlo. Ciamemo co dispreso le nostre Lengoe : dialeti. Sèmo costreti ver in màn e doparàr schei de càrta ca i stati ne fà valer chel ca li vol co sistemi de signorajo e inflasionisteghi vargognoxi. Li ne òbliga ndàr in volta co pasaporti schedà fa bestie. Li ne ciàma votar ogni tànto co sistemi eletoràl da fàrsa e pa farse politeghe preconfesionà ca li xè in sostansa dei sondaji a ndò no se mete mai in discusiòn i fondaminti. Li ne martela el sarvelo fin da piceneti so na scòla ca la serve sol ca raxentarne el sarvèlo pa on dimàn sernìr i futùri kapò fra cheli ca a se gà conformà de pì de st'altri. Li ne rincojonìse el sarvelo co giornali e tv ca altro li parla ca de omisìdi, sport, e “coltura”. Li ne dixe co ghemo nàr in pensìon e li ne depreda anca el suòr del nostro laòro pa “el ben comùn”. Sta litanìa del “ben comùn” la xè diventà la scùxa pa instauràr na ditadùra totalixante ca la finìse col fàr altro ca el ben de on ristreto grùpo de oligarchi in : oniforme , toga o craàta.

I FALSARI A LI STANPA CARTA

Co se fa on scanvio, in jenere, a se parla de on afàr

equo pi el valor del scanvio el xé bilansà. Femo on exenpio. 10 kg de pere pa 10 de pomi, opur na piegora de 40 kg pa 20 galine, opur 1 kg de rame par 3 kg de aluminio, o 1 kg de arxento pa 13 gr de oro e via discorendo. On ca scanvia na caxa de 100 mq pa naltra de 100 mq so na poxision similàr el fa on scanvio bastansa equo. La caxistega la xe gran complicà co on mucio de ecesion, ma el conseto de ecoità de on scanvio el gavarìa da esar bastansa ciàro. Vedemo deso cosa ocore co i schei.

I stati i stanpa schei, le banche e i stati o le gràn axiende le stanpa obligasion o asion e altri prodoti finanziari gran volatili, senpre de carta!

Vegnemo a la natura dei schei moderni. A se trata de tochi de carta prìvi de ogni valor. Inte el pasà i schei i xera de metalo presioxo, parchè la xente no la se fidava, parchè gnison gavarìa asetà na "Nota de Banco" (Banconota) de carta. Inte el medioevo i ga tacà jiràr sti tochi de carta ciamà "Note de Banco" ca le raprexentava na soma de metalo presioxo deposità in casaforte. Col tempo i ga tacà far jiràr ste "Note de Banco" co na copertura 1 a 10 de metalo presioxo parchè 1 so 10 el ndàva tor l'oro deposità a garansia. Col tempo, stanpàr "Note de Banco" a xé diventà senpre pi incontrolà. I stati i se ga apropià del monopolio de stanpàr ste "Note de Banco" ca naltri ciamemo "Schei", e li ga eliminà ogni garansia sostansiàl a coertura de ste Banconote. In pratega no ghe xè gnison metalo ca el garantisce i schei de carta ca

i ve dà, ma solo el sistema fiduciario finansiaro e l'inpoxiion de el stato. Se vardè puito, stanpar schei xe proibio, rifiutarli xe proibio. Ca lo volì o no lo volì i ve obliga dopararli.

Penseghe puito, i stanpa on toco de carta e i ghe scrive sora 5 euri, ma ne vienlo spontaneo dimandarse par cosa no i ne dàli pitosto 10 gr de arxento ca li ga el steso valor? Parcosa ne dali carta invese de metalo presioxo?

La risposta furba de chi ca a porta la craata o la divixa la xé: "Perchè l'argento può scendere di valore!".

E lora dixemolo ciaro: "Ma i schei de carta, el toco de carta ca ve resta in man, coanto valelo? E par coanto baso posa ndàr on toco d'arxento el varà senpre pi de on toco de carta, o no?

Naltra risposta da prete la xé: "Il metallo pesa troppo, meglio la carta". Rispondemo: "On gramo de oro el val 35 euri, on ca jira co 1000 euri, el jira co 28 grammi, ve pareli tanti?".

Ma gnisòn se gàlo dimandà parchè xeli vegnesti fora cusì tanti cronpa oro? Parchè la crixì, parchè tute ste tase struca-scarsele? El Veneto el xera na miniera de oro. Inte el 2008 ghe xera 1 kg de oro pa ogni Veneto. El stato taliàn e l'alta finansa i gheva bexogno de struçàr fora sto òro dai Veneti e el mejo modo xera de portarli volontariamente a la mixeria pa inposesarse de 5 mila tonelà de oro ca se catava in Veneto!

Tornemo ai schei: "Ve parelo on scanvio equo, chelo de laoràr, de vendar le vostre robe, i vostri ojetti, pa i

tochi de carta ca stanpa el stato? Xèlo equo scanviar robe reàl, servisi e materiàl pa tochi de carta privi de valor? Par cosa no stanpeli e no fali sircolar schei de oro e arxento? Valtri ghe daxì oro, servisi, beni e lori i ve dà tochi de carta co scrivesto su nomari e firmà da on laureà a Harvard?

La trajedia la xé ca i ne ga esproprià de tuto, de la vera soranità monetaria. No xe pì i sitadini poseder i metalli o comunque el reàl controvalor dei schei, i ne ga ridoto a farse dar l'oro pa tochi de carta a ndo i ga el corajo de scrivar nomari e firmar: "il governatore della banca...".

Sto chive el xe el vero crimene, i falsari a li xe i banchieri, a xe i politeghi, a xe chi ca goerna l'alta finansa. L'obietivo el xé de sciaixarve, creàr scanvi senpre pi dixegoal ca in sostansa i xè la moderna sciaitù: ON TOCO DE CARTA PA LA TO ROBA, PAL TO LAORO, PA I TO BENI REAL!!!! STA CHIVE LA XE LA LEGALIXASIÒN DELA SCIAITÙ MODERNA.

ENERGIA E FINANZA: IL MODELLO POST 2° GUERRA MONDIALE

Gavio mai vardà la coalità e coantità de scoase ca produxì ogni dì? Da le scoase a se capise el vostro modelo de vita. Pexè le vostre scoase senza acoa, e capì el modelo economego e filosofego ca el goerna el mondo da 70 ani.

Le goere, i golpe, le morti bianche, el petroldolaro, le baxi Usa in tuti i paexi petroliferi, i carteli enerjeteghi, le sansiòn, la politega monetaria ca i Usa li ga detà al mondo, li xè el prodoto de on modelo economego ca i Usa li ga sernio pal mondo a la fin de la Segona Goera Mondial.

La vitoria de le trupe Aleà contro l'ase Nazi-Niponego, la xé inputabile a la mancansa de risorse enerjeteghe dei perdenti. No xe stà la braura Inglexe o Mericana, no xe sta la "justa cauxa" o l'intevento divìn, ma l'aceso e consumo de le risorse enerjeteghe. Aerei, cari armà, camion, treni, nave, fabreghe... li se moveva alimentà direttamente o indiretamente da petrolio o derivà del petrolio.

El binomio enerjia fosile-svilupo, el xé sta la colona ideologega ca la ga comandà tuto el mondo partir da la fin dei ani 40 del segoło pasà. Eco parchè i Usa li ga monopolixà l'estrasiòn e rafinasiòn del petrolio. Volevito el poso de petrolio? Te tocava tor tecneghi Usa e ver el pameso Usa. Volivito la rafineria? Se i Usa no volea, i scominsiava bombardarte o far sansiòn? Ma lo savio ca l'Iran ca el ga le pi gran risorse petrolifere del mondo fin i primi del 21exemo segoło no el gheva gnancora na rafineria? Sa i volea benxina o plastega, a ghe tocava cronparla l'estaro. Volevito cronpàr el petrolio dai "statì canaja" tipo Libia, Jugoslavia, Onion Sovietega? Enrico Mattei co l'Eni ghe gheva proà.

No ghevito el petrolio ma te xeri na colonia fedele dei

Usa? Washington el ativava on programa standard de svilupo:

- Instalasiòn rafinerie e depositi petroliferi drìo le coste (Marghera xe l'exenpio Veneto)

- Prestiti in dollari Usa pa cronpàr el petrolio da le colonie produtrisi de petrolio

- Inpulso a le industrie dei derivà de scarto de la rafinasiòn e tuto l'indoto

Fin de la fiera el rixultà el xèra e xé:

- a)Indebitamento monetario e intaresi da pagar de le colonie verso i Usa o i so strumenti bancari (Fondo Monetario, Banca Mondial).

- b)Ricatabilità politega consegoente de tuti i leaders.

- c)Goere, omisidi, sansiòn, emarjinasiòn, golpe, invaxiòn, ocupasion militar...par chi ca no se adegoava.

- d)Dipendensa dal dollaro (de le colonie) ca ai Usa ghe bastava stanpàr!

- e)Imisiòn fora de via dei prodotti de combustión dei fosili inte l'atmosfera. Semo drìo delibaràr i pochi ani na coantità de gas ca se gheva imagaxinà so la tera in sentenari de milioni de ani.

- f)Produsiòn de scoàse plasteghe e sostanse chimeghe ca le ne mena a la morte premadura persentoàl (a do sifre) de la popolasiòn (cancro, leucemie, disfusiòn, alerjie, intoleranse...).

Tuto sto discorso xé sta possibile solo delapidando na risorsa fosile e tignindo costante la cresita del PIL (Prodoto Interno Lordo). La cresita del Pil, la

parmeteva de pagàr el debito e de aumentarlo, dando cusìta la sensasiòn de cresita e finansiando l'economia Usa.

Coali xeli sta e li sarà i costi omani e ambientàl de sto modelo?

Parchè gnisòn ghe ne parlo? Parchèlo el silensio fin inte le oniversità e facultà de economia, soi jornal, soi media?

El ver sernio sto modelo economego, de pansiero e sosiàl, la xé sta na inpoxiòn de poche parsona ai vertisi del goerno militar Usa a la fin de la 2° Goera Mondial, e el xe sta afinà co la creasiòn del Petroldolaro. Tuto el resto el xé consegoensa.

La vera rivolusiòn omana del nostro tempo, la xè chela de delibararse dei combustibili fosili e eliminàr el debito molandoghela tuti in tuto el mondo de pagàr debiti ai goerni, stati o banche.

Xè vero pa on fià ghe sarà on tremòn, ma sgonfiaremo na bola suisida, e dopo se podarà ricostruìr on mondo co baxe pi solide e ecoe.

I EROI DE STI ANI: FUMITI, SINEMA, TV.....

A ve lo ricordelo i film de sti ani?

Chaplin, I corsari de Hollywood, Stan Laurel&Oliver Hardy, Totò, Arsenio Lupin, Zorro.....

ve lo ricordelo? I eròi a li xera tuti banditi, ladri, falsari, pòri cà, carserà, piràti..... insoma tuta xente ca la piaxéva propio parchè la se contraponeva a le istitusiòn. La xente pagava el bijeto o la fàva la fila pa

entràr in sto mòndo de trasgresiòn contro l'intocàbile autorità costituìa. Ma dixìme vàltri a ndò a se podévelo vedar sfòtar on carabinier e ridar senza èsar inprexonà o batìsti?

A partìr da i ani 60 i rejìmi li gà estendesto le àrme del consenso. No li podea parmetar ca a ghe scanpàse la jestiòn dei eròi. E xe cusì ca gà tacà vegner fòra i vari Roger Moore, Clint Eastwood, Sulle strade della California.....

Vòlivito vardàr la tilivixiòn? Volivito vardàr el film la domenega pomerijo? Te tocàva de impersonarte in sti eròi de rejìme. E xe cusì ca a semo rivà a vedar drìo na divixa o na craata dela xente rispetàbile. Sto raxentamento del sarvelo mediatego, sti eròi costruì ad hoc, li ne gà creà na gàbia mentàl cusì grànda ca la ne pòrta a l'autosensùra. 40 àni de masificasiòn mediatega, de eròi de rejìme, a ne gà idiotixà pan.

A SEMO FIULI DE L'ERÒR

A ve sio mai dimandà còsa ca fàlo ca ogniòn de nàltri a el sìa difarente da st'altro?

Cosa xelo ca a ga faxesto ca da on màgma protèego rento le acoe dòlsi dei osèani primordiàli, se gàe svilupà i primi èsari bònri riprodurse e bònri anca de costruirse na parède selulàr?

Parchèlo Mozart el xe difarente de Kafka? Par còsa el nòstro sarvèlo el se ga svilupà in favòr de la coalità e a detrimento de le capacità muscolàr?

Par còsa viénlo premià el patrimonio colturàl, pì de chelo jenetego?

Còsa ne gàlo portà sol satellite Lùna e cosa ne portarà inte on mùcio de altri pòsti?

Tuta la stòria dela vità, fà a la conosèmo, altro no la xe ca la conegoensa de erùri de trascrision del patrimonio jenetego. Ma ànca le descorte sientifeghe, le bataje militàri pardeste, le partìe a scàchi pardeste, i duluri e joie de la vità, le ribeliòn, le lote anarcheghe, naxiste, comuniste, independentiste, sioniste, relijòxe..... altro no le xè, sa a volemo analixàr, ca: el prodòto de erùri.

Galilèo el xe on eròr. El xera stà slevà inte el rispèto dei detàmi de la teològia, del sistema Ristotelego. E Einstein, ma ve pàrelo normàl ca na mente slevà fin da putelo crèdar ca Newton el ghesse raxòn la podese formulàr na lèje ca la riva contradìr bona pàrte de la siensa pasà. E el pòro Copernik ca i ghe gheva insegnà ca la tera la xe ferma e el sol e tuti st'altri ghe và par atorno? Ma on ca pensa ca la tera a se mòve el gà propio da èsar fiòlo de l'eròr? Xelo o no xélo vèro? In fin dei cùnti “el sà bon senso ca el xe cusì ben pùto distribuò, fra i èsari omàni”, el ne consilia ca chelo ca a vedemo e persepemo el gà da èsar par fòrsa la verità.

Credilo ca VanGogh no el ghesse vò pùchi problèmi no inpiturìr el mòndo fà st'altri pintòri del so témpo? Descartes el xera cresesto soto le verità dei Jexuiti ma el xe vignesto fòra sbajà, el xe stà on eròr parchè

invèse de finìr pa riprodùr le verità de sànta Màre Céxa el gà metesto in dúbio tùto. E Spinòza, nasesto pa diventàr on gràn rabìn, el xe finìo pa fàr le pulisìe so na ostarìa.

E nàltri ca a li ne gà slevà soto le àle dela scòla itajàna, inpïenandone de fiabe propagandisteghe italiote, ca li ne gà insegnà piànxa co sentimo le bande ca sòna l'ino, a comovarse co vedemo la stràsa verde/bianco/rosa sol penòn, ca li ne gà insegnà dîr “forza italia, siamo italiani vèri” e altre stronsade sìmili, nàltri se ghémo ribalà.

Ma penseve, se tùto el mondo ndase par atorno senpre compagno, cosa canviarà? Ca gusto ghe sarìselo vîvar?

L'eror el xe la vera sàl de la vîta, de l'existensa. L'eror el xé el vèro motòr estropego de l'oniverso.

EL CONSETO DE “ESTERO” E “FORESTO”

Cosa giustìfichele ncòra ste paròle? I confìni li xe sta cavà, rento l'Europa a se pol movarse a le stese condision ca rento el stàto taliàn. Ma lòra còsa tìgnelo in piè el consèto de diversità e nasionalìxmo? Cosa justìfichela la paròla taliana “èstero”?

Vardemo i sîti de le compagnìe telefòneghe taliàne, lòri el consèto de èstero ghe justìfega tarìfe asùrde e mantìen paradòsi del tìpo ca na ciamàda da Bolxàn a Nàpoli la costa 10 olte de pì ca na ciamàda da Bolxàn a Insbruck o Munchen. Le manifenstasiòn sportìve le

tien ncòra in piè sto consèto asùrdo de èstaro. Eco parchè i carànba li invèste pa monopolixàr i atlèti e fàrghe sventolàr el trigolòr. Sto àto a vol dîr rivendicàr el nasionalixmo taliàn e rinòvo de on sistema ca privileja proprio lòri. Cavà i carànba no resta pi gnìnte suportar l'inpero del privilejo.

La Siàe, la Rai, l'inpòsta sol pasaporto, la Bucalosi, el notàro, le marche da bòlo, le lisense, le xè le òneghe ròbe ca resta. Na sòrta de confine privilejo. In pratega chelo ca a ne difarensia dal resto d'Europa a xé sòlo mandole, privileji, lisense e ostacoli burocrateghi. Ma ghe vorlo cusì tànto darghe na scarpà?

Ca sénso gàlo tignìr le anbasiàte e consolàti de stàti Europèi in Euròpa?

Cavà ste ròbe de Itàlia resta sòl la gàbia lengoistega par chi ca el ga la desgràsia de èsar monolèngo e no cognòsar almanco na segòna lengoa natìva fa el Vèneto, el Tiroléxe, el Sardo, el Siculo.

LA RIVOLUSION DEI MEMI

A ghemo da prodùr e difòndar Mèmi ca li gàbie on gràn poder Parsuaxivo e Replicativo, doparando mèxi de Risonansa moderni e co costi bàsi. El nostro Target, a xè i xoveni parchè a xé lòri el futùro.

MEMI E JENI : PATRIMONIO COLTURÀL E PATRIMONIO JENETEGO

Cosa xéli sti mèmi e cosa sti jèni? Tachèmo dal scuminsio dela vîta so la tera. Sti àni, mejàri de milioni de àni indrîo, co la tera la ga tacà sorarse, inte l'aoa dei màri, a gà tacà formarse pian pianèto le prime forme de vîta, ca altro no le xèra ca èleghe de DNA ca le se multiplicàa smisiandose fra de lòre. Pian pianelo sto DNA, ste prîme forme de vîta senplise, le gà tacà fàrse dei resinti, na sorta de membrane a protesìon da altre sèlule ca a volea magnarle; e drîo man le se gà diferensià in sèlule carnivore e no carnivore. Gà scuminsià cusì la conpetisiòn pa colonixàr i màri e la tèra. Cosa vorlo dîr conpetisiòn? Cosa vorlo dîr selesiòn naturàl? Doparèmo el tèrmino conpetisiòn ca forse el rende mejo la idea. Fèmo el clàsego exenpio dele jiràfe. Par cosa gâle el còlo cusì lòngho? A pàr ca le gâbie svilupà el còlo cusì longo in mejari de àni atraves de on proseso de selesiòn naturàl. Ver el colo longo volea dîr poder magnàr le foje pì alte a ndò gnisòn rivàva, e cusì le jiràfe ca le gheva el colo pì longo le gheva pì posibilità de magnàr e riprodursee. Insoma, ver el colo senpre pì longo voleva dîr ver pì probabilità de soravìvar. A xè cusì ca i fioli de jirafe col colo longo a li gheva pì posibilità de portàr i propi jèni in vanti, de tramandàr jèni "vinsenti" a fioli dei fioli..... La sostansa vèra a xè ca fin dèso i jèni, el patrimonio jenètègo el gà doparà el còrpo omàn pa perpetuàr la so existensa e mantignirsee vîvo inte el mondo. A capìso ca par calchedòn, sto conseto el pòsa èsar difisile, ma la xè la

tràjica realtà. A no xè el nostro corpo ca comanda, ma fin dèso a xè stà i jeni ca gà doparà i corpi pa farse stràda inte el tempo e spàsio conosesto. Pasàr dala non vità a la vità xè xà sta on sàlto gràndo asè, ma deso semo drìo fàrghene naltro. No xé pì la selesiòn naturàl ca la comanda la vità so la tera ma el patrimonio colturàl : i memi. Pa rèndar pì ciàro sto sàlto coalitativo, fémo on exenpio ciàro. Na olta, chi ca fàva pì fiòli a xèra chi ca xèra pì forte, pì in salùte, ca magnava de pì, ca no se malava; mentre i picheneti, magrèti co malatie li morìva vanti da poderse riprodùr.... Co la conchista de on sarvelo pì grando, co la tecnolojìa, le descoerte..... la conosensa la ne gà parmetesto de: èsar pì solidal fra de naltri e mantignìr in vità anca parsona ca pa selesiòn naturàl le gavarìa moresto vanti tempo. Insoma i memi a li ne parmete de conbatar le infermità, de respiràr soto acqua, de volàr, de ver fioli in proveta, de no morìr disangoà, de vedarghe anca da vèci, de ver dinti forti anca pasà i 50 àni, de ver pròtexi al còre.....Podaremo fin canbiàr el nostro còrpo fin rèndarlo inmortàl. Par dirla scèta, i mèmi li xé diventà pì potenti dei jeni; a no xè pì lòri ca comanda! El valòr dela conosensa, de el patrimonio colturàl, dei mèmi, el xè straordinario e xè pa sta raxòn ca tùte ste teorie rasial le xè fùmo inte i òci. No gà pì inportansa el colòr dela pièl, i jèni. Chel ca soravivarà pì de tùto de naltri,chel ca se riprodurà de naltri inte el futùro, a sarà i mèmi. Sa a volemo vùnsar le nostre batàje, a ghemo da fàrle co la costrusiòn de

mèmi pì persuaxìvi e replicatìvi de chealtri. A xè conpàgno de i vîrus. I mèmi li xè i vîrus del prexente e del futùro. In sto nòvo mondo a no gà pì senso la coantità, ma la coalità.

STATI PICENETI MODERNI, STRUTTURE FLESIBILI, EVOLUSIONIXMO, ESTROPIÀ

Mega stati tradisionali, pachidermi, estinsion, entropia... L'evolusion inte el so parcorso la xe partia da èsari microscopèghi ca a li xera boni farse spàsio e soravivar sol ca grasie a le so dimensiòn e la stòria evolusionistega. Fin 60 milioni de ani fà, la parèa premiar le strutture grande.

Pò, co serti canviaminti climateghi ca li xe ocoresti, esar grandi a no xera na coalità pa soravivar, ma ansi on ponto débole asè (on corpo grandò da scaldàr el consuma na fraca de enerjia, el se move lento). Xè vignisti fòra dei èsari picheneti ca a xera boni soravivar a sbalsi termèghi considarevoli, co on sistema gran efisiente.

Inte na fàxe pi tardiva de la storia evolusionistega de la tera, a xé vignisto fòra ca chei èsari ca li xera bùni transmetar memi a le jenerasiòn futùre li xera pi forti de cheli ca solo transmeteva jèni. Semo drìo parlàr del patrimonio colturàl.

Dixemo ca la economia a la gà na funsion seletiva frente strutùre politeghe. E vardè ca pa economia no intendo la finansa etc... Pa economia intendo on

conseto evolusionistego. Ve fàso on exenpio : Doparàr lanpade al led a ne fà sparagnar 50 olte de pì ca doparar le lanpare a incandesensa. Vol dir ca na fameja ca la ilumina co le lanpare led la sparagnarà 50 olte de pì de na fameja ca la dopàra lanpare a incandesensa. Vol dir ca la gavarà na disponibilità de schei pì granda pa far altre ròbe e vivar mejo. Isteso pa chi ca dopara la machina gas, o chi ca dopara internet pa paràr 1000 mesaji invese de scrìvar 1000 letare e inbustarle co el bòlo. La politega, la vigne par bona parte modelà da le exigense economeghe; le economie dòpo a le interajise fra de lore e xe ramai impossibile ca la economia de on stato no la dipenda de st'altre. Dixemo ca la economia moderna la xè transtatal e interativa. Inte on mondo a ndò le economie le xe in parte condisionà da le politeghe de ogni stàto, a xé naturàl ca chei stàti ca a xe màsa lenti, masa burocratixà, masa costoxi, màsa ideoloxixà, masa prevegnisti, masa prejudisievoli, masa veci, masa grandi, co strutture obsolete da mantegner.....a li vegnarà penalixà da le leji economeghe in fòrma supariòr de chei stàti : flesibili, picheneti, ràpidi, inovativi, open-minded, xòveni, co strutture moderne.....

Femo on exenpio : lo savì ca l'Armenia la gà 3.5 milioni de abitanti e la gà na anbasiata in ogni stàto. Ma al pàri de tuti i stati pichenini, li gà na parsona co on tinbro pì on ufiso so on appartamento e al màsimo na segretaria. Me ricordo 10 ani fà l'Olanda la gheva

verto na anbasiata in Armenia : on omo co on tinbro na scrivania, on fax, on telefono, on PC. E tuto funsionava a la perfesiòn. Gavìo mai vedesto le anbasiate ca gà la Italia o i so consolàti? On palaso intiero co polisia, segretari, portinari, visesegetari, anbasadori, corispondenti..... pexo de na corte! No parlemo pò dei stipendi. Fin dela fierà el costo procapite pa sitadìn de sta marmaja de parasiiti el xe supariòr in chei stati grandi fa la Italia, anca sa li gà na poplasiòn granda. Ma lo savìo parche le gran axiende le xè destinà la bancaròta? Parchè a no le xe competitive? So le grandi axiende a se perde completo el senso de la spexa. Tuti roba, tuti magna, tuti se inbùxa, tuti pensa solo rivar fin del mexe e gnisòn el xe responsabile. Gavìo mai vardà na axienda familiàr? Par cosa credìlo ca el modelo Vèneto el xè pì forte de chelo Todesco? De chelo Mericàn? Le struture picenete le xe responsabili parchè xé tuto a vìa. Gavìo mai vardà i atleti picenini ca fà le acrobasiè? Gavìo mai vardà invese i mandoloni? Gavio notà ca inte i stati piceneti la xente la parla pì de na Lengoa, la xe verta, la viaja, la xe sveja..... gavìo mai vardà i italiani : ignoranti, mandoloni, senpre far figure da bauchi in ambienti internasionali. Storegamente le gran struture statàli le gà vìa la so raxòn de exìstar sol pa na raxòn difensiva : chi ca gavea pì òmani da fàr copar vinseva la goera. E se a vardemo la storia del mondo, a se inacorxemo ca propio on stato picenin 70 ani fà (Israele), el gà dà el scominsio a na invarsiòn de

tendensa, dimostrando ca piceneto e intelijente, a xe pì forte ca grando e òco. Invese de ver mejari de bauchi kamikaze da paràr al maselo, xe bastansa ver la tecnolòjia pa tingnìr boni i ignoranti.

I mega stati dei do segoli pasà, altro no li xé ca na aberasiòn storega, li xe obsoleti, inefisienti, inutili e ansi, altro no li fà sa no parasitàr la popolasiòn e tignirla rento na gabia de ignoransa e poertà. Chela ca nàltri a ciamemo Libartà e Indepandensa, la xe tùto fòra ca na brutta roba, la xé on real spìrito de soravivensa, de rajòn, de verità de urtòn estropego contra de on mondo ca el ne vòria far mòrir e portar verso l'entropia, el fredo el dixordene. La sostansa vera e final de l'evolusionixmo altro no xe ca la lotta contro l'entropia. El nostro anèlito a la libartà el xè parte de sto sentimento estropego.

EL VALOR DE LA DIVERSITÀ

Lo savio ca ogni dì a se estingoe dele spèse de animal e piante pa el sfrutamento senza rispetto ca l'omo el xe drio far so la tera? Ve penselo ca parché vegna fòra na spèse, a ghe vol on nòmaro grando de jenerasiòn, mejari e mejari de àni. Farla sparìr a ghe vol on ninìn de tenpo. Ca valor gàle le spèsie? Le ga el valor de arichir el mondo de varietà, de conosensa, de opportunità! A digo opportunità parchè propio la diversità jenetega, la xe na risorsa de opportunità fà le raixe de na pianta sototera o le rame de na pianta ca

serca de ciapàr la lùse. Oportunità vol dir ca na spese la costruise na serie de rapporti e relasiòn co tuto l'ambiente sircostante. Ve imajinelo sa a sparìse i lièvori da le foreste o le morejete? Sparirìa tuto l'indoto drìo de lore. Ogni èsar vivente el xè on anelo ligà co st'altri. El raprexenta na pendola ca tìgne l'echilibrio co altri sistemi e strutture. Chi ca fa sparìr na spese, el xe on criminàl. Deso paragonè le spèse viventi a le nostre axiende. Coant ghe métela na axienda nàsar e prosperàr? Coanti sforsi? Coante bataje? E deso dixime coanto ghe metelo on schifoxo de stàto taliàn farle morìr, estingoarle par senpre? Credilo le vìgna sù fa funghi inte on dì?

MA STO TÌBET XÉLA O NO XÉLA NA TEOCRASIÀ?

I pensieri contro corente ne fà senpre pùto e me imàjìno li podarà tocàr i ponti fisà ca ogniòn gà rento la so mente, le so sicurèse e verità. Calchedòn de nàltri gavarìselo el coràjo de no darghe raxòn ai Tibetàni e suportàr parsialmente la represiòn ca el goerno dela Sina Popolàr el xé drìo fàr? L'Iran la xé senza eufemixmi na teocrasià e pa sta raxòn l'osidente no pol tratàr co l'Iran in sto momento, e propio parché i leaders de Teheran a li xé vèri òmani de féde, ciamémoli fanadeghi, ca vol dìr ca li antepòn la propia féde a le raxòn enpireghe e lòjiche ca le gà conpagnà pàrte de el svilùpo de l'osidente. Vardèlo cosa no gà

conbinà la céxa catolega sol so periòdo de féde fanàdegà: la gà jenarà teorìe discriminatòrie, rasiste, inchixisiòn, discriminasiòn. A me ricordo ca inte i àni 70 l'osidente el condanàva l'Orss (Onion de le Republeghe Sosialiste Sovieteghe) parchè a li proibìva la relijòn catolega. Co so ndà vixitàr chele bànde li me gà spiegà le raxòn, e pòso dir ca da on ponto de vùsta statàl no le xé sbalià. L'Orss la parsevitàva i predicaduri dela relijòn catolega parchè li semenava idee prejudisievoli rispèto al “mecanisixmo” Marxista. A li considaràva la predicasiòn catolega romàna na sòrta de organixasiòn ca la difondeva idee prejudisievoli, mètì, fiàbe, buxiè. I predicaduri dela Cexa Catolega Romàna, a li xèra vedesti fà dei gùru ca li plajava la xente. El proxelitixmo catolego romàn, el xéra vedèsto fà na sòrta de antagonixmo ideolijico parchè no el se alineàva al materialismo de stàto. Strinxémo... el Vategàn xela o no xéla na teocrasìa? El Tìbet sarìsela o no sarìsela na teocrasìa? Xéli o no xéli stà dele teocrasie? Serchemo de vardàr le ròbe dal pònto de vùsta dé Pekìn : I Budisti a li prèdegà na relijòn, li vol instauràr el so sistema teocratego, farghe el lavajo del sarvèlo ai putìni rento i tìmpli, li ghe insegna la xente ca ghe xé spìriti, divinità. I Budisti li vol instauràr la so sèta al podèr e controlo del teritòrio e de le menti de la xénte.

I goerni pi avansà de l'Osidente, a li proibìse de insegnàr le relijòn inte le scòle pioveghe, li insegna

Darwin, li insegna chimega biolojia, fixega, eletronega etc... I goerni de l'osidente li gà metesto i pichèti in ciàro co le vàrie relijòn e dïto, ve parmèto de operàr ma ste tinti de no fàrghe el lavàjo del sarvelo a le parsòne, no ste exajeràr. El confìno no el xé gnancòra ciàro, e dixèmo ca ghe xè senpre da discùtar, ma no se riva a gran conflitualità parchè le relijòn de l'osidente le xè in sostansa bastansa coròte, e no orbe de féde. E me ripèto, el problèma ca el mòndo osidentàl el gà co l'Islam, el xè ca i fedèli de l'islam li xè vèri fedèli, li xé vèri fanadeghi, no li xè parecià discùtar la propia fède e edulcorarla segon le mòde e interasiòn col pensiero osidentàl enpirego, Galileiàn, Einsteinian..... Tenpli budisti, scole coraneghe, semenàri, scole rabìneghe, altro no li xè ca lòghi a ndò se ghe fà el lavàjo del sarvèlo ai putèli e se ghe insegna dele verità ca le discorda co chéle sientìfeghe. Naltri a condanèmo el conportamento dela Sina Popolar, ma fémosse na dimanda : còsa gàlo produxesto el budixmo, gàli fésto coalche avanso tecnolojico co la so relijòn, a ndo sarìsimo sa li dominàse el mòndo? Inte la Sina Popolàr, ve pòso dïr ca l'ìve a ghe xè progrèso sientìfego, reserca, inovasiòn e ògni dï, la condisiòn omàna la xé drìo mejoràr. Naltro pònto el xè gran inportante vanti de molàr sto discòrso. Fève sta dimanda : Co el judaismo el xèra monopolista inte la antìga Israel xèrelì cusì toleranti i rabìni? Co el catolisexemo el xèra monopolista inte l'Europa antìga xèrelì cusì toleranti?

Penselo ca la teocrasìa monopolistega de Teheran la sìa cusì pasifista? Credilo ca se el budixmo el fùse monopolista in Tìbet, sarìselo cusì pasifista e tolarànte co i disidènti?

ON DÙBIO CARTEXIÀN

So la chistion relijoxa la pensemo gran difarente, mi preferìs on stàto làego de stàmpo Galileiàn, tolarìa le relijòn ma ghe proibirìa ai ministri de culto de contàr buxiè e fiàbe a la xente o de fàr leva so le desgrasie e la paura de la mòrte. A le relijòn no ghe darìa gnisòn finansiamiento. A go la sensasiòn ca le goèr le sìa sta cauxà in bona pàrte da i conflèti relijòxi. Co sto discorso àso in piè on dúbio Cartexiàn : "Ma el mètodo Galileiàn xela diventà la relijòn de stàto? La chistion la va afrontà seriamente e go paùra ca la risposta la sìa "sì", co na onega difarenza fra tute le relijòn, la relijòn del metodo Galileiàn la amete l'eròr e la se mete in discusiòn e in dúbio ogni momento.